

Ag craobhscaoileadh fhocal Dé

Ceist 1

Beidh tú ag féachaint ar ball ar thuairisc faoi chúrsaí creidimh ar na meáin shóisialta. Sula bhféachfaidh tú ar an mír, pléigh ábhar na míre leis an duine in aice leat. Féachaigí ar an bpictiúr chun cabhrú libh. Bainigí úsáid as bhur samhlaíocht mura bhfuil aon ní faoin scéal ar eolas agaibh.



Ceist 2

Ceangail na focail Ghaeilge leis na focail Bhéarla.

- | | |
|---------------------------------|------------------------------|
| 1. teachtaireachtaí spioradálta | a. <i>in contact</i> |
| 2. paidreacha | b. <i>demand</i> |
| 3. gné | c. <i>to compile</i> |
| 4. a chur i dtoll a chéile | d. <i>spiritual messages</i> |
| 5. eagarthóireacht | e. <i>prayers</i> |
| 6. i dteagmháil | f. <i>gospel</i> |
| 7. éileamh | g. <i>knowledge</i> |
| 8. tarraingteach | h. <i>appealing</i> |
| 9. saineolas | i. <i>editing</i> |
| 10. soiscéal | j. <i>aspect</i> |

1	2	3	4	5	6	7	8	9	10

Anois, féach ar an tuairisc den chéad uair le feiceáil an féidir leat na focail sin a aithint sa mhír nuachta.

Ceist 3

Féach ar an tuairisc den dara huair agus freagair na ceisteanna seo thíos:

1. Cá bhfuil an tEaspag Fiontán ó Monacháin ina chónaí agus cá bhfuil sé ag obair?
2. Conas a chuireann an tEaspag focal Dé i láthair an phobail?

3. Cathain a thosaigh sé ag cur físeáin spioradálta ar líne agus cén fáth?
4. Cad é ábhar na bhfíseán seo?
5. Cad a deir an tEaspag Fiontán Ó Monacháin faoin bPápa féin?
6. Cad a deir sé faoi Íosa Críost ag deireadh na míre?

Ceist 4 ‘... an-spéis ...’

Bain úsáid as na haidiachtaí seo a leanas chun na rialacha a bhaineann leis na réimíreanna **an-** agus **ró** a chur in iúl:

Féach an sampla: **an-chiúin** **róchiúin**

beag
mór
aisteach
sean
te
óg
dorcha

Ceist 5 ‘...An tEaspag Fiontán Ó Monacháin ...’

Pléigh na ceisteanna seo leis an duine in aice leat:

1. Cad is brí le **Mac** agus cad is brí le **Ó**?
2. Tá iníon amháin agus mac amháin ag Colm Mac Grianna. Sorcha agus Cian is ainm dóibh. Cén sloinne atá orthu, mar sin?
3. Tá iníon amháin agus mac amháin ag Seosamh Ó Dúill. Áine agus Peadar is ainm dóibh. Cén sloinne atá orthu?
4. An mbaineann tú úsáid as an leagan Gaeilge nó as an leagan Béarla de do shloinne? Cén fáth?

Ceist 6 Pléigh na ceisteanna seo leis an duine in aice leat, nó le do ghrúpa.

1. Cad a cheapann tú faoin obair a dhéanann an tEaspag Fiontán Ó Monacháin?
2. Cén fáth nach bhfuil an Eaglais Chaitliceach chomh cumhachtach céanna is a bhí sí caoga bliain ó shin, dar leat?
3. Cén fáth, dar leat, a mbíonn an reiligiún tábhachtach sa tsochaí i gcoitinne?

Treoracha agus Freagraí

Ceist 1

Plé atá i gceist leis an gceist seo.

Ceist 2

1	2	3	4	5	6	7	8	9	10
d	e	j	c	i	a	b	h	g	f

Ceist 3

Féach an script.

Ceist 4

an-

Séimhítear focail dar tús consan a leanann **an-**, seachas focail dar tús **d, t, s**:

an-bheag
an-mhór
an-sean
an-te
an-dorcha

Ní thagann aon athrú ar fhocail dar tús guta tar éis **an-**:

an-aisteach
an-óg

ró

Séimhítear focail dar tús consan a leanann **ró**:

róbheag
rómhór
róshean
róthe
ródhorcha

Cuirtear fleiscín idir **ró-** agus guta:

ró-aisteach
ró-óg

Ceist 5

1. Mac – son / Ó – grandson
2. Sorcha Nic Grianna / Cian Mac Grianna
3. Áine Ní Dhúill / Peadar Ó Dúill
4. Tuairimíocht atá i gceist.

Ceist 6

Is féidir gach grúpa a chur ag déanamh an phlé seo agus ansin na ceisteanna a phlé leis an rang iomlán.

Eimear Ní Chonaola

Bhur gcéad fáilte ar ais. Tá bealaí nua-aimseartha ag duine de na heaspaig is óige in Éirinn le teachtaireachtaí spioradálta agus paidreacha a chur ar fáil i nGaeilge agus i mBéarla do dhaoine ar fud na cruinne. Baineann an tEaspag Fiontán Ó Monacháin leas as chuile¹ ghné den teicneolaíocht lena chuid físeán a chur i dtoll a chéile agus a roinnt ar na meáin shóisialta.

An tEaspag Fiontán Ó Monacháin, Easpag Chill Dalua

(Tá fáilte romhat agus muid ag leanacht² ar aghaidh leis na machnaimh spioradálta. Agus meascán atá againn inniu. Cuid de as Gaeilge agus roinnt eile as Béarla.)

Áine Lally

Tá an-spéis go deo ag Easpag Chill Dalua sa teicneolaíocht. Ó thús na paidéime, bíonn míreanna físe á dtaifeadh aige, scrípteanna á réiteach aige agus eagarthóireacht á déanamh ina stiúideo beag ina theach, in Inis, i gContae an Chláir. Go dtí seo, tá beagnach ceithre chéad físeán i nGaeilge agus i mBéarla curtha le chéile ag an Easpag Fiontán Ó Monacháin.

An tEaspag Fiontán Ó Monacháin, Easpag Chill Dalua

(Go raibh beannacht Dé i do chroíse, an lá seo agus i gcónaí. Áiméan.)

Thosaigh an nós ag tús an *coronavirus* (an choróinvíris), nuair a tháinig sé, agus ní raibh muid in ann dul i dteagmháil le daoine, mar nach raibh cead ag daoine dul chuig an Aifreann. Dar ndóigh, bhí na *webcams* agus *YouTube live* agus rudaí mar sin. Ach bhí mé ag ceapadh go raibh rud éigin eile ag teastáil ó dhaoine le coinneáil i dteagmháil leis an gcreideamh. So, thosaigh mé an nós, ag déanamh físeáin bheaga inspioráideacha ar na Naoimh éagsúla, ar na féilte móra – an Nollaig, an Cháisc, an Aidhint, An Carghas agus rudaí mar sin.

Áine Lally

Cé go bhfuil daoine ag freastal ar na hAifrinn arís sna séipéil, deir an tEaspag Fiontán go bhfuil éileamh fós ar a chuid físeán. Chuile Dé Sathairn, bíonn suas le sé fhíseán réitithe le cur amach an tseachtain ina dhiaidh sin ar *YouTube*, *Twitter*, *Facebook* agus *Instagram*. Níl aon easpa scéalta deasa nó ábhar tarraingteach ann, dar le hEaspag Chill Dalua.

An tEaspag Fiontán Ó Monacháin

(Inniu cuirim tharam: Neart Neimhe, Solas Gréine, Gile Gealaí...)

Go leor sagart agus roinnt de na heaspaig, tá siad á ndéanamh freisin. Ach, is breá liom aon saineolas atá agam a roinnt le daoine, más rud é go ndéanann sé maitheas. An Pápa féin, bíonn sé ag déanamh go leor físeáin bheaga agus is iontach an áis é. Tá mé ag ceapadh, dá mbeadh Íosa Críost beo sa lá atá inniu ann go mbeadh sé ar *YouTube* agus ar na meáin shóisialta ar fad, ag scaipeadh an dea-scéil. Dea-scéal an tsoiscéil.

(Críost liom, Críost romham. Áiméan.)

Áine Lally, Nuacht TG4, Inis i gContae an Chláir.

¹ leagan canúnach de ‘gach uile’

² leagan canúnach de ‘leanúint’